



# Luvo en Caster dra Diamantliga-kroon

## Marizanne Kok

Ver, verder, Luvo!

Die verspringer Luvo Manyonga het sy seisoen gisteraand met nóg 'n hoogtepunt afgesluit, toe hy in Zürich, Switserland, as Diamantliga-kampioen gekroon is.

Manyonga was baas in die Diamantligareeks se laaste verspringeindronde van die seisoen met 'n monster-sprong van 8.49 meter.

Om alles te kroon, het sy landgenoot Rushwahl Samaai tweede geëindig, danksy 'n beste sprong van 8.31. Die duo is ook onderskeidelik eerste en tweede op die 2017-wêreldranglys – en dis duidelik dat Suid-Afrika se verspring-toekoms in goeie hande is.

Ditto die 800 meter vir vroue, waarin Caster Semenya nog eens stof geskop het in die oë van elke vrou wat dit saam



**Caster Semenya is gister vir die tweede agtereenvolgende jaar as Diamantliga-kampioen gekroon.**

Foto: GETTY IMAGES

met haar op die baan gewaag het.

Semenya is in 2015 laas oor 800 meter geklop, en dit sal nou so bly tot in 2018, ná 'n sege in haar laaste wedloop van die jaar.

Die Potchefstroomer, wat twee weke gelede as wêreldkampioen gekroon is én die heersende Olimpiese kampioen is, is vir die tweede jaar in 'n ry as Diamantliga-kampioen gekroon.

Sy was gister in Zürich baas met 'n tyd van 1 minuut en 55.84 sekondes en het byna 'n sekonde voor die naaswenner, Burundi se Francine Niyonsaba (1:56.71) oor die wenstreep gehardloop.

Die Tuks-naelloper Akani Simbine se laaste wedloop van die jaar het geen vreugde oplewer nie, toe hy net sesde in die 100 m kon eindig, in 10.10. Die Brit Chijindu Ujah was baas in 9.97.

Vir Suid-Afrika se 400m-hekieslopers was dit ook 'n vergeetbare aand.

Wenda Nel moes met die sesde plek tevrede wees, met 'n tyd van 55.86 sekondes.

Die Tsjeg Zuzana Hejnova (54.13) het gewen.

LJ van Zyl was in sy wedloop net sewende in 'n tyd van 49.92.

Die Brit Kyron McMaster se wentyd was 48.07.